

28 APR 2001

Mahathir-Pas (Bergambar)

HENTI PULAU: PAS KENA SUSUL DENGAN AMALAN, KATA DR MAHATHIR

KUALA LUMPUR, 28 April (Bernama) -- Datuk Seri Dr Mahathir Mohamad berkata tidak cukup Pas sekadar mengeluarkan kenyataan menghentikan pemulauan terhadap anggota Umno sebaliknya ia hendaklah mempraktikkannya.

Perdana Menteri berkata Umno akan melihat dulu sama ada saranan Mursyidul Am Pas Datuk Nik Abdul Aziz Nik Mat meminta anggota Pas berhenti memulau anggota Umno itu akan diamalkan.

"Kita tengoklah...kadang-kadang Nik Aziz buat kenyataan yang cukup baik tapi kita nak tengok ia disusuli dengan amalan ataupun tidak," katanya kepada pemberita sebaik tiba di Pangkalan Tentera Udara Diraja Malaysia di Subang daripada lawatan dua hari ke Emiriyah Arab Bersatu.

Dr Mahathir berkata demikian ketika ditanya mengenai kenyataan Nik Aziz semalam yang meminta anggota Pas menghentikan perbuatan memulau anggota Umno kerana tindakan itu merugikan Pas sendiri.

Menurut Nik Aziz perbuatan pulau memulau tidak sejajar dengan Islam yang menghendaki umatnya sentiasa berdakwah.

Dr Mahathir berkata bahawa mengeluarkan kenyataan sedemikian memang mudah tapi yang perlu diteliti sama ada ianya dipraktikkan.

"Nak cakap memang mudahlah tapi kita nak tengoklah amalannya, sama ada orang Pas nak boikot orang Umno lagi, sembahyang dua imam, simpan mayat di kubur asing-asing, orang Pas tak nak kahwin orang Umno...ini semua kita nak tengoklah," katanya.

Dr Mahathir juga ditanya sama ada anggota Umno boleh mengunjungi rumah anggota Pas berikutan kenyataan Nik Aziz bahawa beliau sendiri sudah mengambil langkah menghentikan pemulauan ini dengan mengunjungi rumah anggota Umno.

"Kita tak pernah tahan...kita pergi, (tapi) dia orang pun tak beberapa seronok " kata Dr Mahathir.

-- BERNAMA

RV AZZ MAI